

«El è la vusch da l'avegnir»

Partida populara dal Grischun

DA GION NUTEGN STGIER / ANR

■ **Tegnair pitg al cartel da pussanza da las autras partidas tar las elecziuns da la regenza vul la pps grischuna cun Walter Schlegel, il cumandant da la polizia chantunala. Per las elecziuns dal cussegl grond èn fin uss enconuschents 21 candidats e candidatas da la pps e 20 substituets.** La sala da l'Hotel Marsöl a Cuira era glindesdi saira pli che be fullanada. En rotscha èn ils delegads, las delegadas, ils simpatisants e las simpatisantas da la pps grischuna vegnids per assister a la radunanza da nominaziun. Il grond interess saja il meglier mussament che la pps saja fitg bain represchentada en tut las regiuns dal Grischun, ha ditg *Heinz Brand*, il cusseglier naziunal e president da la pps chantunala. Il pievelun conferma er che la pps haja gudagnà fitg a format politic e ch'ella saja represchentada en intginas executivas e quai en l'entir Grischun, però er en blers auters gremis politics. Be en la regenza saja quai na anc il cas, dentant cun ina personalitad, in um correct, ina persuna seriusa ed in magistrat da pled sco *Walter Schlegel* sa midia quai suenter las elecziuns da la regenza, ha accentuà Brand.

Premissas idealas per avair success
Heinz Brand è persvas che suenter ils dus naufragis tar las tschernas per la regenza cun sia persuna sco candidat haja la pps uss ina bler meglra partenza. Las premissas sajan idealas cun esser la pps cun 30% dals votants e da las votantas la pli ferma partida en il Grischun. Quel resultat da las elecziuns naziunals dal 2015 duessia esser la basa per il success en in mez onn tar las tschernas per la regenza ed er per il parlament. Ultra da quai haja la pps cun Schlegel in ferm candidat, sco strusch in'otra partida, ha menziunà il president da la pps grischuna.

Sa mussar be da l'apéro da Bumaun na tanscha betg

La regenza dovria urgentamain in represchentant che haja las abilitads da manar, che s'engaschia per tut la populaziun e tut las regiuns ed in um qualifitgà, quai che saja da preschent strusch avant maun en la regenza. Cun Schlegel saja pussaivel da rinforzar la regenza cun qualitad e cun bleras fermezzas, ha accentuà Brand. Er quai che pertutga il turissem saja el la persuna predestinada per dar a quel novs impuls. Sa mussar be da l'apéro da Bumaun

da Grischun Vacanzas sco quai che la regenza fetschia adina na tanschia betg ed ils auters 364 dis strusch s'interessar per turissem ed economia.

Betg adempli las aspectativas

Da las qualitads da la regenza duai mintgin far ses agens patratgs, ha punctuà Brand. *Jon Domenic Parolini* n'haja fin ussa segir betg adempli las aspectativas. I saja bunamain in'impertinenz da la pbd da vegnir cun dus candidats e lura anc cun ina persuna sco *Andreas Felix*. Quel

haja pouca experientscha da star avant ad in gremi. *Peter Peyer*, il candidat da la ps, quel saja bain mussader da scoletta, dentant per far part dad in gremi sco la regenza tanschia quai strusch, ha manegjà il cusseglier naziunal da la pps. La pcd, quella haja er il curaschi da vegnir dasper *Mario Cavigelli* cun anc in candidat en la persuna da *Marcus Caduff* ed er quai fetschia bain surstar ch'ina partida cun 16% dals lecturs vules esser represchentada en la regenza cun dus umens. L'unica partida che avess il dretg d'avair dus re-

preschentants en la regenza saja sulet la pps.

Er in represchentant da las Vals talianas

Senza ina cuntervusch da total 160 delegadas e delegads è Schlegel vegnì nominà uffizialmain sco candidat per la regenza. El saja ina persuna cun experientscha politica, ha ditg *Roman Hug*, il president communal da Termin, il lieu nua che Schlegel è da tgasa cun sia famiglia. *Fulvio Betti*, il president da la pps Poschiavo, ha cunzunt fatg attent che cun Schlegel fassess part a la regenza in um cun in cor che batta er per las Vals talianas dal Grischun. *Nicola Stocker*, il president da la pps giuvna dal Grischun, ha ditg che Schlegel saja ina personalitad extraordinaria. «El è la vusch da l'avegnir», ha punctuà il giuven da Termin. Walter Schlegel è sa mussà ventiraivel da tants mussaments da simpatia. El vules esser in cusseglier guvernativ per vegl e giuven, metter in il center la segirezza, dar nov schlantsch al turissem ed a l'economia e lura er esser ina ferma pitga en la regenza.

Cun Gabriella Binkert e Renatus Casutt

Da preschent ha la pps en il parlament chantunal nov represchentants. A partir da las proximas elecziuns grischunas duessian quai esser in pau daplis. La pps haja da surpigliar responsabladad per manar il chantun puspè sin la via da success e quai sappia ella be far cun ina ferma fracziun e cun in anc meglier cusseglier guvernativ, ha ditg Brand. I saja in fatg plaschaivel che fin ussa sajan 21 num publicis da persunas da la pps che candideschian per il cussegl grond. Tranter auter èn quai er *Gabriella Binkert* (Val Müstair) e *Renatus Casutt* (Glion).



Walter Schlegel (a san.), il candidat da la pps per la regenza, cun Heinz Brand, il president da la pps grischuna.

FOTO G. N. STGIER